

69

HARVARD COLLEGE LIBRARY
FROM THE
HARVARD-YENCHING
INSTITUTE

APR 29 1930

~~Ch L 3203.83~~

Ch L 3203 / 3142 / 83

江南通志卷一百六十

人物志

孝義

四

安徽二府

安慶府

晉何叔度廬江潯人恭謹有行業母早卒奉劉氏姨若所生官至太常卿子尚之

何琦字萬倫司空充之從子父卒琦年十四哀毀過禮事母純孝孜孜色養及母喪方殯在堂適鄰家火琦撫棺號哭俄而風止火息

南北朝宋何子平廬江潯人令海虞得祿惟以供母不及妻孥母喪去官哀毀踰禮大明末東土饑荒繼以師旅



八年不得營葬晝夜號哭常如袒括之日冬不衣絮夏不就清涼一日以數合米爲粥不進鹽菜所居敗屋不蔽風日兄子伯興欲爲葺理子平不肯曰我情事未申天地一罪人耳屋何宜覆其敦厲名行如此

梁何炯字士光廬江潯人炯年十五從兄允受業一期並通五經章句爲永康令以和理稱遷治書侍御史以父疾經旬衣不解帶頭不櫛沐信宿之間形貌頓改及父卒號慟不絕聲竟以毀卒

唐徐仲源望江人事母至孝母疾割股爲糜母食而愈貞元中邑宰以其孝上聞勅號所居鄉曰孝感母夙畏雷仲源必躬爲掩耳旣卒葬於宅之東南隅每遇雷震輒

伏墓曰仲源在斯郡邑又以聞再命築孝義墩賜白華軒以彰之

元周樞密潛山人逸其名至正間武進士紅巾賊寇境聚鄉勇屯馬園寨保障生靈十餘萬先後十五年屢破天完兵以功授樞密同知明高帝出師鄱陽借糧於周周助米千二百斛洪武時令守舊土有德於民民祀之

杜萬戶桐城人元將也僞漢兵陷安慶余闕旣死其妾甫生一子棄水濱杜見呼之曰此余參政子義種也悉捐所攜物懷其子去今桐城洪濤山王氏卽其裔家廟猶祀余參政云

方德益元末自池口徙桐以好義稱所居隣學宮衢隘

江南通志 卷一百一
割宅地之半以廣之桐溪水出龍眠暴漲則激石漂木
不可渡議橋者難焉德益捐金造橋甃石堅緻迄嘉靖
未猶賴之

明葛宣潛山人明太祖討陳友諒輸粟千餘石至鄱陽餉
軍太祖義之

黃榮六桐城人時掛車河有吳貴自稱元帥性兇暴貪
財好殺榮六奮義爲保障築六兒城於蔣家山遠近不
能自存者皆來歸適明太祖下安慶榮六請降不受爵
賞遂歸山

曹鏞懷寧人母龍氏病聞人肉能療疾割體肉以進疾
愈復作又割胸肉以進未幾疾又作鏞妻王氏割臂肉

以食母旣而病大作鏞又割股母疾竟瘳洪武時以孝
旌

楊貴安慶人母蔣氏病割左股及脅肉以進母疾遂愈
詔旌其門

汪思義潛山人喜施予正統戊午間江北旱潦頻仍思
義輸穀賑之勅建旌義坊表其門

謝佑桐城人字廷佐正統間進士少孤貧事母至孝歷
官山西右布政致仕歸臨卒母喪未終遺言衰經爲殮
死不忘親也

檀郁字子復桐城人家貧少孤母汪守節奉事至孝母
卒無以爲葬或贈石山不可穴泣禱於神有鄉人夢神

云檀孝子有穴曰湧泉可丈許耳或解之曰人湧泉穴屬足其山麓有穴乎求之果得窆遂廬墓側無水苦遠汲忽石罅出泉色瑩味甘三年郁歸泉遂涸正統時旌魯希曾號兩山懷寧人與弟希周菽水侍母必歌詩以侑之母疾三年衣不解帶學使欲旌之希曾泣辭曰此自生人恒事何忍以父母博名高哉學使降階而揖愈敬禮焉

阮以臨字象源懷寧人少有豪氣總督葉夢熊奇之征寧夏疏薦偕往以臨潛然流涕曰温太真以一代人豪特急功名絕裾而出千古薄之吾奉菽水他不問也力辭不起母歿每除夕必墓宿

韓祥印字維熊再刲股療祖母及母疾

石檜字耕榮宿松人讀書明大義成化丙戌歲饑與弟棠各輸粟五百石出賑事聞賜七品冠服

吳本清懷寧人親疾籲天求代及歿哀毀骨立廬於墓側有湧泉產芝之異成化時旌

曹規字循理望江人成化間以明經爲邠州判重義樂施嘗捐資礱石作櫺星門及兩圩牖歲凶設粥以活流殍具棺以掩齒骼鄉里深德之

殷溥字直菴宿松人父早世母以哭夫喪明溥事之極孝成化癸卯領鄉薦丞營祿養就教嘉興遷國子監助教覃恩錫封勅中有母節子孝之褒母亡後遂不復出

許本忠與劉澄俱懷寧人弘治年旌

吳鯉字躍如懷寧人正德庚午鄉薦知蔚州時總兵官劉定之以呈誤論死人多稱冤鯉未謀面卽入見督撫備陳輿論之公力爲解救得未減踰年歸里劉遺以金拒不受

胡效才字用甫桐城人嘉靖乙丑進士少貧授徒以養父事繼母盡孝儲贄築室東郭授仲弟築室南郭授季弟皆體父母意也江陰令以故交餽金帛不受僅受布二端歸以奉母晚登第卒於京邸猶致書兩弟以不及終母養爲憾

國朝雍正五年 特旌

方鵬字其大懷寧人家貧繼母馬氏遇之恩薄鵬百計承順有女弟馬出也馬意欲鬻其居以嫁之母旣卒鵬如其意治奩以遣父歿刻木像飲食必祭會他出夢父有怒色立馳歸有家僮簪其像號泣治之蓋誠孝所感登嘉靖間進士痛祿不逮親終身不敢自奉

呂腆太湖人嘉靖時以孝旌

吳堂字德升桐城諸生父患脾痛堂手自抑搔數月不使人代至丙夜父命之退猶泣不忍離父病革屬堂曰汝母非汝不能盡菽水權也將析產伯兄爲政堂僅得瓦廬半間以奉母有圃在伯兄舍後偵兄意欲之遂作券因族長遺之不受值歲祲有歸粟數十斛者堂縮口

江南通志 卷一百一
五
節食以其羨給諸從兄弟及比鄰之乏者後以子一介
貴贈副使

龍涌字本一望江人家被火祖母方甦睡奔入烈燄中
扶祖母起負之出父病危剖股以療尋愈嘉靖時詔旌
其門曰慈順

方岱字明鎮望江人孝友端慤嘉靖中歲薦當選以母
年九十七終養不仕詔授官以旌之

方可字子時桐城人力學養志其伯仲皆異母父又獨
愛可伯仲俱恚之可怡聲柔色不敢仰視父歿伯仲爭
其貲訟之官可曰兄弟無訟詞不訴鞫不辨有司察而
直之嘗置義倉輸穀以濟貧者

張祝桐城人年十歲剖股療母

彭寶字惟善性孝友伯母葬鬻書助之居父喪哀思廢
寢食竟以是卒

陳所聞字辛華桐城諸生少孤奉孀母獨任勞苦得其
歡心手一編督耕隴上就土性而權衡之所獲常倍次
第爲弟妹營婚嫁又各畀田一頃邑令陳贊化式其廬
舉鄉飲賓

周聘字廷聘桐城諸生父母繼亡家貧十年不能葬坐
卧苦塊終日哀號如袒括時知縣李尙默捐俸命諸生
往營葬聘曰爲人子而以親喪煩長吏其何能安守塚
凡十二年遂能知來言休咎頗驗或問不習占候術何

由知曰靜久不覺乃爾

陳邦符潛山人襁褓失怙母萬氏年二十守節至邦符數歲誠之曰兒能勉讀父書庶不負母忍死意也符聞感泣就塾師出入必稟母命父遺產二十畝推讓於叔父教授生徒支月俸爲母養母卒廬墓哀毀以恩選歷三縣學博遷潞府審理致仕

汪昌應字爾麟潛山人邑有鬻妻償逋者爲贖還濱河大水漂蕩男婦棲木杪適昌應舟載稻百石過忽聞哀號傾稻載之以歸

方之綱字振宇桐城人少與弟之紀以篤學見稱萬曆丙子舉於鄉授雲南曲靖府推官之紀因兄入仕慨然

曰兄出則弟當處課農桑以成兄爲廉吏耳之綱在任亦念弟不置投簪徑歸兄弟聚處終身時論高之李之讓字太初太湖人父早逝母劉苦節教誨後得祿而母死終身不衣帛甘食以母在時貧故也司教桃源值歲旱士多飢死有司猶嚴督逋賦乃號泣請免不聽遂棄職歸

張思誼桐城人八歲父卒事母極孝夏驅虫冬炙爐必親爲之值令節必坐母堂上衣冠拜堂下起獻酒拱立將撤拜如初五十年如一日弟思誼孱而愚思誼衣食之終身年未三十鰥居不更娶曰恐有室則於吾弟疎也

江南通志 卷一百一
周登字大舉桐城人撫亡弟孤子成立弟亡時有貲千金托登姪不知比長悉以與之

周自字明德桐城諸生弟覽侵賦有司督之急令覽售產於自以償自代輸八百金不受產惟取一雕鞍曰弟所以逋賦者太侈故爾欲碎之以示誠宗人或以請卽與之居數年賦仍不杜又納二百金覽願以產償自終不忍覽感泣後竟稍克自振云

張廷中桐城人兄弟五人旣析箸弟業日落廷中滋殖曰吾不忍弟之壁立也集諸弟合爨而居久之諸婦有後言廷中曰吾知厚弟耳安問其他悉以所殖之產五分之二仍爲輸稅終身怡怡如也

方初字子復桐城人成童卽至孝父邁疾溽暑嚴寒不離卧側妻盛氏亦孝人謂初刑于之化焉

黃敦字效仁桐城人有同祖二弟家落鬻產敦曰不可委祖澤於異姓厚直取之弟後日困乏敦曰吾何忍取弟產欲弟知艱苦自立耳今能治生矣遂以產還不取其直

郜冠字德纓桐城人以孝聞葬親桐梓山每過必泣拜而後行

朱文林字士先桐城人六歲喪父家貧櫛髮爲藝竭力奉母母病思魚市無魚文林禱水投竿卽得復病篤剖乳下一瓣以進母遂愈母卒廬墓豺虎往來不爲害竟

以哀毀卒

胡琴太湖人母鄔氏早亡繼母徐氏嫉琴琴惟盡孝母疾禱以身代母愈聞之感動母嘗晝卧雖盛暑以衣冠揮蚊蠅不輟及母九十琴年七十矣定省益勤事聞旌其門曰七十而慕

馬繼周太湖人父早世母陳氏撫孤成立及母卒傷其以苦志終廬墓三年哀號之聲聞者增痛萬曆間母子並旌

夏孝子字以忠桐城人本名思八歲時割股療父疾郡守為更今名父卒廬墓三年歸子女不識也子民懷萬曆中舉鄉薦內行純至歷任安陸宜黃二縣令不能聲

程昇懷寧人節婦聶氏子兩次割股愈母疾

盛應魁與葉正奕俱懷寧人以割股稱孝

段正洪懷寧人母葉氏卒會鄰家火將延及正洪以身蔽棺號天甚哀忽雷雨大作火隨止

葉日初字寅初望江人萬曆中舉鄉薦時方具慶介眉侍壽猶執少儀友愛諸弟館穀悉分給以資舉火人稱真孝廉

方祉字子受桐城人兄祿患疫近者輒染癘有死者祉扶抱服勞不離左右祿謂之曰爾乃不畏疫耶曰智者不信幽而棄禮仁者不違道以求生卒無恙兄亦尋愈朱應麟字仁吾宿松人居陳漢山積倉萬石萬曆戊子

虞劉二賊踞長溪兩臺調兵進剿將為清野計應麟奉檄一夕燬盡賊平詔縣給銀五百兩堅辭不受請充客兵之餉

顧槐太湖人事父至孝凡父意所在無不委婉承順父死廬墓三年萬曆間建坊旌表

殷效字子學桐城人繼母夏有二子美衣豐食就傅授書而裁效衣食使之耕效胼胝作苦甘淡泊無難色夕歸濯足更衣侍側色常愉父喜勞之曰惟爾克家食指漸繁爾其尸餐效益奮力乃致千金分給諸弟不以錙銖自私夏亦感悅遇效有加

王鰲桐城人父卒廬墓日夕哀號思慕不已忽夢父曰得金所在人稱為長者

金騰高字上達桐城人任俠好義邑大饑出所積穀二千石悉賑鄉里曰所貴夫好義者補天地之不足也豈乘歲禮而自為利乎詔旌其門曰義民

李璽字廷玉桐城人籍順天其友汪冕赴廷試病於邸囊有百金付璽人無知者即卒璽為治棺殮主其喪召冕子至京迎喪因以父金還之

方學尹字起莘桐城人葬父奉遺命與繼母同窆學尹不敢違掘穴有石號泣顛天鑿石以厝後徙墓皆成土矣人以為純孝之感

錢元道桐城人有商主其家既去糞除見遺金約二百

餘度商已遠乃置倉中壓以積穀次年商復至言別後失金元道曰此非途中失也發倉示之囊括宛然遂還之

朱東字漢卿桐城貢生晨詣學見道旁遺金弗顧僕曰後人寧不攫之乎乃收之約二百餘金以聞於校官出示招之則糧役王姓所遺也王請分東笑曰天欲損爾豈令我見速挈去

陳希學字子敦桐城人嘗赴試過香爐寺如廁見遺金百餘兩收之居不去僧曰文宗且至何乃逗留曰吾與友約姑待之三日失金者哭而至曰以吾父之嚴而失稅金也進不勝官刑退不勝父刑死矣希學出而還之

張清雅字玉楚潛山人力學養親明季獻賊至父卧病侍湯藥不去既卒甫斂賊又至疑棺藏金銀欲剖視之清雅以兩手據棺賊斫手仆地幼子超藝從牀底躍出求代俱死焉而棺得不剖其僕雲滿殯其父子亦不食死

東廷選潛山人流賊至母老病不能行竊負避草間爲賊所獲叩頭流血求殺已捨母賊殺之氣絕猶抱母不釋手母幸得全其妻收廷選尸殯如禮囑其子文露曰姑老矣汝善事之撫棺大慟墜岩而死文露援之不及胡朝烈潛山人割股療母腕痕無血

袁學知字非生潛山人母陳氏病割股食之立愈

金道會字仲貞潛山人父客死金陵每一追思血淚迸
出明季流賊盤踞道會避虎頭寨時荒疫流行道會運
米得三十石同寨中索貸踵至同室者言吾食指浩繁
米將盡奈何道會流涕曰誠然然不忍人飢而我飽也
米盡飢兩日長子承蜩夜冒鋒刃審視賊營間道得脫
道會歸遇死傷露骨買棺葬五十餘塚
呂之徵字愈疏太湖人父歿廬墓三年
馬之龍太湖人篤友誼好施予兄人龍官楚藩明季寇
亂楚人有爲賊掠流於湖者之龍曰此阿兄子民也具
貲糧遣之壬午城陷之龍子亦被執至楚彼地亦爲優
禮送還以報之

汪文煒字純符宿松人母早世隨父避地江左父亡事
伯兄如父奉繼母以孝母始苦之後亦爲所感萬曆癸
卯舉於鄉歷知靈邱令致政歸產薄不及中人令其子
與兄子均之毫無私厚嫁孤姪女一如己女晚歲貧窘
處之淡如

石汝修字止所宿松人父歿廬墓三年

田荆字義軒宿松人官省祭幼而喪母繼母駱氏撫養
之及長事母孝母喪明每食必親奉母病親嘗湯藥不
解衣數月母喪號慟幾絕二弟蕙蘭幼荆撫育之田舍
分給無私財焉

方友信宿松人母病割股友信子際明際奎孫孔成孔

祐俱刲股和粥救親時稱方氏五孝

張洪猷字伯卿宿松人喪父廬墓三年母疾刲股療之

朱守益宿松人母疾刲股

劉之瑄字朗生宿松諸生流賊至適父病風家人呼出
避拒曰父卧牀惟有死守耳賊斫其父瑄以身蔽之連
受數刃而死父得免

袁師臯字理衡宿松諸生母老齒脫不能食師臯年已
六十必口哺之賊至執其母殺之師臯奮與賊鬪亦死
焉事聞旌表

萬民望字兩虛宿松諸生母年八十流賊至負而逃遇
賊泣告願以身代賊殺之而貰其母兩臺旌其死孝

楊士奇字伯英宿松人辛巳城陷父介八旬被賊執士
奇匍匐出救賊已舉刃抱父同死

張瓚宿松人乙酉城潰父庠生映光為兵所執瓚給以
多金求全父許身為質父得逸去遂遇害

葉應龍宿松人母疾刲股

蔣珉望江人父病刲股

王維翰字思重望江人父疾究心岐黃家言調藥進多
奇中後以明經訓廬江移辰州教授以母老不赴鰥居
數十年起卧不離母側母年九十五卒維翰哭母遂終

李德賓望江人母病吮癰寢食不離母側二十年

章繼魯字思樸親病籲神求醫必長跪涕泣親歿除喪

祭祀必哭

王準字明衡望江人父忱生準兄弟獨準食餼卽自任甘旨忱易簣遺數十金獨與準準泣拜請公分昆弟弟惟乏嗣準憐之同起居飲食二十年惟先死有私囊百金舉以報德亦公分諸猶子

阮之鈇字韜甫懷寧人乙酉城潰母老病不能行兵至鈇爲母請命不許請以身代不許遂挺身障母格鬪而死子湛九齡得脫於難順治初補諸生痛父死孝之烈哭求直指以事聞

詔建坊旌表

方都韓字大方懷寧人居母喪盡禮後父遇兵以身代父死父得免

吳汝鼎懷寧人早孤傷痛嘔血兄病拮据致參藥以餌之嘗忍饑啜粥不顧也

蔣奕芝字鍾韓懷寧人乙酉城潰兵刃其母以身覆之遂死母背上兵爲色動母幸得全

黃淡字元味懷寧人城潰母被刃淡與兄中通中德俱以孝死

陳道賓潛山人割產撫孤姪又設義塚葬露骨

劉應甲懷寧人叔父母無嗣病篤遂不應秋試侍湯藥營葬如子鄉里稱之

宣塗字明瞻懷寧人無子妻爲置妾見女有戚容詢之

知係名家子召其父母還焉

張自孔字石門宿松人廩生性孝資敏年十二隨父避賊見執賊問此處有馬否父未及答自孔給曰吾家有駒藏在山洞願釋父去取賊從之私與父曰父得生還兒死無恨矣賊久待不至遂引去數月亦脫歸
張應宸字若葵桐城人性至孝親喪哀毀友愛尤篤捐費修城率其兄弟悉力守禦卒無恙歲饑賑粥全活千人舉明經不仕卒聞者皆為流涕

張久中懷寧諸生授徒自給性孝友好義族黨有逋課者每損館穀代償盜入室久中覺之謂曰汝良家子也何至此以所存脩金為贈誠令自新卒感化復成家業終不言其姓名座右書隨處體認天理凡事求近人情二語以自警省後以子清議貴追贈朝議大夫崇祀鄉賢

國朝張秉彝字孩之桐城人也生而穎慧為文一本經術以廩例入南雍授別駕念兄秉文官四方而父母春秋高不忍離左右遂謝去里居侍養極意承懽秉文為布政殉難山東泣走數千里扶三櫬攜藐孤以歸弟秉貞以大司馬卒 京邸

諭賜祭葬悉贊襄成禮弟秉哲孝廉早亡親視含殮身遇大喪哀禮兼盡廬墓塚樹交花人謂孝感有祖置義田經營墾闢助婚勸學贈給有差修譜牒以收族設糜粥以賑

江南通志 卷一百一
饑生平隱德未嘗告人而恭儉謙約始終一節晚益邃
性命之學以子英貴

特諭賜祭贈文華殿大學士

孟命世字淑子懷寧人順治初征南譚將軍辟參軍務
以功授知九江府焚刁民誣逆狀保全數千家移守端
州申免浮糧數萬石初左良玉兵破安慶父振邦罵賊
死兩弟俱被掠命世徒步數百里崎嶇萬狀冒險贖歸
卒皆成立

田德產太湖諸生母被亂兵執德產與妻出救求代得
並釋城陷復負母得脫母歿守墓三年督學李嵩陽疏
請建坊 旌表

劉日曜字歿伯桐城人隱居教授母歿年七十猶孺子
泣廬墓三年

任塾字克家懷寧人幼爲名諸生乙酉城潰兵執其父
將見殺塾請以身代兵異之父得脫順治丁酉舉於鄉
康熙丁未進士歷任儀部郎督學山左廉聲最著

陳彝字以常潛山諸生事繼母以孝著同學有忤當事
者禍且不測彝挺身直之卒賴以平年三十卒妻宣氏
謹事孀姑稱一門雙孝

葉士怡字怡如潛山人明季寇亂奉母避山堡賊獲母
脅贖士怡鬻產贖回又遇賊母倉卒墜岩傷足負行百
里餘未幾卒哀毀盡禮

汪世奕字貽遠潛山人幼至性過人八歲喪父哀毀骨立若成人事繼母婉容愉色委曲承歡

張杰字如三桐城人性孝友世父秉文以山東布政殉城死杰總其家政成立其孤諸子德之割腴田以酬固却不受司鐸吳門會郡饑當道委賑太倉崑山諸境部署周詳民沾實惠巡撫湯斌欲薦之拂衣而退舉鄉飲賓

章于國太湖人性至孝母溺水死于國哀毀絕粒倚廬哭泣逾於常制

姚士堅字廷若桐城歲貢篤行好義邑西挂車河當孔道多暴漲行者時溺死士堅募造石梁自捐七白金歲

饑賑粥活數千人他所施濟門無虛日以故家業中落猶典鬻爲之不懈卒之日人皆流涕

張瑱字公瑋桐城諸生持身嚴毅厚宗族置義田焚負券鄉里德之

左之琮字宗玉桐城人性至孝讀書山中母偶疾之琮忽心動急歸人咸異之樂善好施多所全活老而嗜學著作尤夥

金葵字尙美潛山人祖業素封俱捐以賑饑嘗典衣飾易米三十斛鄰里告急輒散之僅存三斛晏如也

周天鳳字羽長桐城諸生少失怙事母以孝稱從兄死兩子俱幼捐己屋產以與之族子藻無依收育如己子

經紀其衣食婚娶俾至成立子四人俱孝謹有文行徵出尤積善好義不媿父風孫大璋中雍正二年進士姚士堅字注若桐城人由明經歷官刑部郎中論決多平反謝病歸居鄉嫻睦設粥賑飢遇貧乏者力爲周恤甲寅征滇黔兵絡繹經桐吏欲徵費里民墜念民力不堪鬻產給芻糧合邑賴以安堵

周斌字允二桐城人性純孝居父喪盡哀節母章失明斌朝夕調護七年復明人謂孝感撫育亡姊遺孤四人俾成立授產與己子均皆世俗所難

方中發字有懷桐城諸生篤學力行嘗捐宇建先人理學祠刊兩世遺書百卷讓產推財鄉黨皆稱孝友舉鄉

飲賓著白鹿山房詩集行世

方來賓桐城人割股療父

楊昭雍字南有懷寧諸生性篤孝父病割股療之樂爲義舉有鬻妻以償逋者爲歛財以保全之生平力學以程朱爲宗著猛省格言克復圖說

張永錫字來遠桐城人性孝既鰥不再娶同父寢處父病需蘆根徒步往返百餘里抹而進之父歿隱居不出戶每剃髮則曰身體髮膚受之父母命子純謹藏之卒後柩爲蛟水所漂矢純取所藏髮瘞于母墓謂之髮冢丁藻字以偉潛山人食貧力學敦篤孝義年十八路拾楊某遺金忍饑坐雪俟楊至還之楊分金以酬拂然而

去歲稔欲賑無力徧募粟以濟之

劉士義潛山人有孝行 雍正九年 旌表

姚孔鉞字升初康熙己卯舉人以母老不上公車朝夕
孝養不離左右仲弟牧滄州積逋數千破產代償好讀
書尤潛心易理 雍正十一年 旌表

張恭桐城人天性誠篤出嗣季父曲盡孝道父歿水漿
不入口者三日族有貧不能婚葬者割己田爲義田以
歲入租贍之嘗過金斗見販牛客以賊攫金投水救甦
恭傾囊償之客賴以歸 雍正十一年 旌表

姚士覺字東膠峽江令文焱長子性至孝母方疾篤割
股和藥以進血迸流衣袖不知其痛楚也庚午舉於鄉

父歿京邸徒步扶襯歸里哀動行路里中孤幼無依與
失學者撫養教誨賴以成立者甚多嘗客吳中有鬻婦
以完宿逋者出囊金代還買山數處掩瘞枯骨無算其
急難好義類如此 雍正十三年 旌表

都先覺字依衡桐城諸生潛心理學實踐躬行父母有
疾衣不解帶對人言必泣下家貧授經於外父母所欲
必力致之色偶不懌長跪終日俟其顏霽而後起里中
共推爲純孝云

江萬里字遠公桐城諸生性孝友析產以腴者奉三兄
自受其瘠者後三兄家落仍以己產與兄子共之歲饑
捐米數百石賑濟里稱篤行君子

張若霖字巖舉大學士英冢孫少詹事廷瓚長子年十一母卒哀毀骨立如成人事父曲盡色養尤善承繼母歡母亦忘爲前母子也與弟需相友愛需歷仕浙東粵西霖每寄書必戒以官箴勗以祖訓生平寡言笑性恬淡家世貴顯霖處之如寒素杜門却掃不輕交接然邑有公事不憚指陳利弊遇水旱力爲募賑所全活甚衆歿後鄉人思之多流涕者

王曰貞字德水桐城人孝事繼母弟被盜挺身出救盜感而去屢償姪逋明末歲祲設粥廠於家存活甚衆嘗遊姑蘇值閭門大火罄舟米二千餘石給之蘇人爲之勒碑每歲施棺藥無算順治丁亥出粟賑飢至於鬻產

迄今稱之

徽州府

唐黃芮欵人刲股爲羹以愈繼母病父卒廬墓終身墓側產芝及連理木貞元十九年旌表

吳九郎休寧人黃巢寇至舉義兵保鄉井與賊戰不利衆潰馬上自刎奔逐半里許身方墜地馬亦死鄉人卽其處立祠祀之名其地曰倒馬墩

宋王六欵人母凌目瞽草屋半間風雨不蔽去依親金氏久而馱之時六甫九歲掖母歸故址刈薪易米以養事聞旌表

祝確字永叔欵人親喪廬墓兄弟先後死熙河確往返

萬里以歸其喪吏部朱松爲諸生時確歸以女生熹郡城遭方臘之亂朝議徙治溪北潦漲爲患確倡衆訴於朝復如其舊

程四欵人幼孤鞠於姑家姑病革四省問退曰吾幼失怙恃姑猶母也誓當報德乃焚香取髓粥而進之姑之疾遂愈

夏休休寧人早孤孝養其母母卒廬墓墓生瑞竹又生芍藥並蒂者二鄉人號其室曰雙應

曹矩字晦之休寧人景祐進士官屯田郎中馳贈父汝弼燎黃之夕芝產塋上事聞詔賜所居爲孝芝里從父文死方臘之難世稱忠孝

陳克己與鮑乙俱休寧人陳割肝鮑鑿腦以愈母病汪廷美婺源人百口聚居食必同席親喪盡哀祥符中減賦美亦減其佃租有鬻香者去後發其裹得金追還之里人竊其鵝問之曰將以祭先美更助以魚酒有從質麥種者過期言種敗無收美還其質更遺以麥時號爲汪長者

王德聰婺源人少孤孝友信義爲里所稱一家幾千指同居七十餘年天聖初奏旌

張珏字公子婺源人第滋坐罣誤當死珏曰吾力單微養母不如弟自拘於吏遇恩徙邊以是見知後以軍功得官朱子稱其天資孝友有古篤行君子所難能者

詹惠明婺源人父坐法當死惠明詣縣求代不許獄上
惠明復詣郡請嚙指出血詞甚哀不見省方盛夏伏府
門外以艾自灼其頂明日至庭下復割右耳擲廳事上
血淋漓守大驚竟爲奏報詔減其父死而釋惠明
許規祁門人常客宣歙間旁舍某郡人病且死出囊中
金以骸骨屬之及死規昇棺從千里外界其家人并還
其金

汪標婺源人父復通判揚州德祐末兵至復正坐不去
兵欲執之標以刀拒斃一兵左右負復走衆遂殺標丞
相馬廷鸞以書唁曰能執干戈以衛父母世不乏童區
寄矣標年十四云

元鄭安字子寧歙人宋亡明年李世達叛李木魯敬將屠
城安叩軍門曰亂僅世達一人耳民何罪而欲屠之敬
乃止旣沒鄉人祠之

鮑元鳳歙人元季寇亂鳳與妻子訣曰吾有母不能爾
恤遂躬負母深避巖穴亂定歸薄暮恍若神導與妻子
遇俱獲全

黃一清字清夫休寧人母病革一清籲天願減己算以
益母壽夜夢人曰明日老嫗來當得藥旦果有嫗授以
啖蜜法乞蜜隣鄉夜還遇虎號泣曰我死不足惜如母
蜜何虎熟視而去

戴焞字晉翁婺源人父卒與二弟焮焯廬墓三年朝夕

奉盥上食如生客至兄坐弟立老而不懈
朱震雷休寧人累世同居

〔明〕葉仁休寧人父宗茂饒州知府坐事罰輸築城仁上書
請贖罪太祖嘉其誠宥之

汪葵黠人生元末每晨多造飯攜斧入山至暮乃歸妻
怪問之笑而不答又嘗煮芋菽搗粉築墻人莫之覺及
土寇爲亂葵隱入山柴舍宛然村落中有積糧葵部分
居之時以芋墻充食存活甚衆

洪宏祖字深遠歙人爲郡守陳彥回所重靖難兵起宏
祖白守勤王成祖卽位收彥回宏祖亦投水死

汪存字廷堅歙人隨父商歸宿邑之汝灘天未明父捨
舟先歸人言前路有虎存冒雨追四十里始及父果遇
虎山陬存泣告天曰願虎傷已勿傷吾父虎竟去

畢文環洪祖鮑文行與李士景四人俱歙人割股以愈
母疾

畢陽幼以孝聞父卒泣血喪明母疾露禱求以身代割
股和藥進之疾愈

何澄字應清歙人割股愈母疾出繼族父後有爭繼者
澄推讓田產無所取惟歲時祀事不怠

吳鼎歙人與兄鼎第珊客黃州衆夜鬪殺人誣鼎吏捕
之急鼎不知所出鼎曰兄年高未有子弱弟老母所憐
皆不可死獨鼎子已長願代兄以塞禍遂詣吏就繫鼎

江南通志 卷一百一
寬之求直不已。婦謂曰：空自苦，必無生望。不若保餘貲，善事老母，撫弟姪，立門戶，毋以弟爲念也。其夜具衣冠，自經死。州人傷之，白府禮殯焉。

黃鑑，字德昭，歙人。父久商，不歸。鑑兒時問父安在，輒號泣不食。家貧，拾薪養母。年十四，告母行訪其父。至黃州，境得之。

許象先，字汝賢，歙庠生。父沒於淮，奔喪盡禮。繼喪母，越十五日，以毀卒。

王靖，字寧之，祁門人。嘗慕張公藝行誼，百口同爨，尺布不私。成化丁酉，鄉薦授交河知縣。人稱其節操。

方尙，用歙人。父患痢疾，割股煎湯以進。隨愈後，尙用病將絕，以不能終養爲恨。迨母病，夢尙用跪告曰：惟享齋可治。如言，果痊。宗鄰咸詫其生死盡孝。

程邦仁，歙人。弟邦儀死於仇，誓死以報。體肥，不耐步履。每日負襆，被身挂二尺竹筒，盛水漿於中。庭疾趨百回，約三十里乃止。日以爲常人，疑其顛。久之，遂健行。聞沈東山爲郡司理，乃徒步走燕邸，訴弟冤。沈哀之，抵徽，遂閱故牘，出邦儀屍驗之。邦仁撫之，慟竟絕。是日，觀者千人，哀聲動山谷。沈雪其冤，卒論抵。

許立德，字伯上，穀長子。母汪氏病，噎不下食。立德亦不食。母沒，哀毀死三日，復甦。彷彿見母送之歸。母葬廬墓側，日夜悲號。父佯稱病，召之返侍。父時念母，慟哭。父亦

慟後恐傷父心每欲哭輒掩面走他所盡哀乃還例當受廕屢讓其諸弟

胡之憲歛人母病篤憲年十歲其姊玉娥年十三相向痛哭憲謂姊曰聞危病惟割股可救遂同拈香告天剗肉和粥以進母遂愈事聞旌表雙孝之門

程周字希旦歛庠生父病周割股和糜以進明年族人利其產誣周殺父幽狴犴者三年遇朝審周至庭下忽風雨大作及開釋天日清朗周父死三年貌如生邑令乃以鼓樂導送歸家

吳榮讓字子隱歛人父沒於楚榮讓十四歲卽往尋舟覆鄱陽湖緣木獲免得父骨於襄陽豪葬誌之越十年再往昇歸後遞葬高曾以下及親戚之無主者九十九喪建宗祠置義田義塾天啟間旌表

江應全歛人父沒兩月而生遇父忌輒悲號事孀母色養盡歡母疾與妻割股以進居喪哀毀負土成墳廬於墓側事聞旌獎

吳公逸歛人少失父母伯兄病劇仲兄困於訟咸竭力救之年終計族人老幼授衣粟歲凶力行賑恤後病篤屬子允復輸萬金佐公家之急奉旨旌義贈官

汪徽壽歛人好施予濟貧窮建橋梁焚券約義聞鄉曲吳修休寧人事母孝火起鄰家修抱母號泣籲天獨免延燒母卒廬墓羣鳥來巢

江南通志 卷一百一十一
程琦字廷珪休寧庠生父病疽琦躬吮之父嗜薯琦終身不忍食嘗授徒遠鄉趨母病夜行峻嶺顛蹶中若兩燈前導及入境始知其爲虎也人共奇之

詹侃字時選休寧人選閔縣尉迎養母母病咳夜需湯侃寢榻下聞咳卽起嘗割股沸湯以進母卒哀毀股創迸裂而沒

金彥文幼孤舅奪母志撫育於祖祖老採薪以養母復寡迎歸病祈代沒廬墓一夜虎過不害人驚異之

汪讓年八十一夢神告賊發其塚奔視賊覺而逸因廬墓側病革始輿歸嘗夜行有猛獸當戶探之甚溫詰朝跡其處已嚙犬去矣里中五谷神爲厲讓檄而滅之汪

循爲讓作鐵漢傳

吳應麟字伯端休寧人幼孤依祖祖沒哀毀骨立每念父不逮養終身屏絲竹第已析產後喪其貲又分己貲以與之

黃侃休寧人生平卓犖嘗條陳淮南北鹽筴利弊使者稱善居家收族建祠置義社義塚義田他如翼宮白岳倉庾道路諸役侃悉與焉入粟佐國詔樹坊褒義

洪什字承章歙人母黃氏二十而寡什事母盡孝服賈家日起力爲善事賑乏困救災患不計恩怨一以厚道施之汪道昆傳其行

汪德壽休寧人居親喪淚盡繼血廬墓三年足不踰戶

汪尙質字賓塘休寧人少孤事兄撫姪盡恩誼四世同
爨無間言

吳繼良字君遂休寧人母亡事遺像如生兄弟相禮讓
構義屋置義田以居食貧者輸郡邑學田又輸還古書
院膏火葬戚屬贖人子女乳活遺嬰表揚貞烈施粥救
饑所行善事甚多

金九苞休寧人割股廬墓

方瓘歙人厭科舉業絕意仕進從廣東湛若水學歸時
同行友死舟中例不載屍瓘祕不告人與同寢累日至
昭州始發之

吳仲成休寧人成化間以孝旌

許欽績溪人弘治時以孝旌

李仕昌婺源人兄仕選爲仇家誣構殺人逃匿逮仕昌
擬抵罪弟仕昭訴曰縱兄逃者我也願以身代仕昌曰
兄逃我長我當其罪二人爭求坐竟爲疑案後令至明
其誣釋而旌之

祝孟謙字志讓婺源人嘗輸粟千石賑饑先是兄孟資
亦輸粟六百石以賑有司上其事建坊旌表

余鎬字宗京婺源人父廷璨冤繫縣獄獄大疫鎬自縛
詣郡求代父死許之父得出後鎬亦免

曹永護字義干婺源人性寬廣犯而不校遇荒歲月杪
必密察隣家之急陰餽之不以語人

汪汝和字守介婺源人故人逋皇木帑八百緡繫獄和竭資代納不責償有鬻妻以納糧者不忍離其子哭之哀和代輸而止其鬻前後焚券累數千金郡守榜其名於旌善亭

汪思智婺源人隨父解軍南京歸舟父卒智恐舟人棄其屍以身掩護日兼人食又時作呻吟聲七晝夜抵饒州城始發喪

曹玘婺源人義烏方時成幼喪母出亡資盡將赴水死玘活之助錢令習業期年父尋得之泣拜去族人宥宿負玘一日醉遇諸塗疑玘將責逋摔玘泥中逸去玘不與校明年大饑復贈之米還其舊券

曹孜學婺源人三歲喪父甫九齡伯仲欲折箸孜學泣曰奈何忍分手足耶伯仲感之復同居十餘載後伯仲緣事繫京師孜學傾產往救坐是貧落無怨言

謝用祁門人其母馬氏妾也生用五月嫡乘夫客外嫁之東都而委鄰家鞠用用長知故扼腕飲泣托游學徧訪數年東都人且死馬氏流落攜幼子自江右來相遇於逆旅哀感行路迎歸奉養事嫡母尤謹有司奏旌其門

馬祿祁門人客旅舍友人以四百金寄祿同舍者盜金亡去祿祕不言罄己資償之已而盜敗友人始知具酒謝之還其銀祿竟不受捐爲修學之費

汪宗淮祁門人父客亳州娶妾宋氏生宗淮三歲父亡
隨嫡扶襯歸母宋氏改適陝西比長念母出潼關抵鳳
翔徧覓一日風雨偶憩道旁見一老嫗荷鋤而來問答
相符卽母也抱持痛哭奉以歸

洪應培 陳邦賢 謝廷薦皆祁門人割股療親疾

謝世麟祁門人父久客無音耗世麟千里尋歸父母相
繼病篤割股救療嘗捐資修明倫堂建聚奎堂

余枝華黟人父九旬華亦七十侍疾卧榻逾年罔懈庭
間忽湧泉以供汲人詫孝感

汪文保黟人嘗拾遺金二百金於路止客舍訪得祁人
謝氏悉付還分金酬之不受事聞太守召使受叩頭辭

守謂謝曰報德途寬汝何以金強人謝俛首曰小民有
兩女願結嫻守曰善問文保子幾人曰子八人有孫乎
曰三十三守起立舉手加額曰有是德宜有是福取果
酒鼓樂送歸

葛恭績溪人母病篤思食生梅時已八月恭但遇梅樹
輒泣竟得生梅二顆食母病遂愈

程伯祈績溪人事親孝謹父卒廬墓插竹編籬有枯竹
生笋之異

朱廣績溪人割股廬墓

方正績溪人母孀居正兄弟孝養卒建蓼莪館於墓左
朝夕哭奠狀聞荷節孝之旌

胡仲俊績溪人刲股療親修橋賑饑卒年九十有四
汪文言休寧人少孤貧補縣吏智巧任術負俠氣入長
安爲監生游公卿間葉向高用爲中書舍人受知於楊
漣左光斗諸君子魏忠賢嗾科臣傅櫬疏劾光斗詞引
文言逮下獄鍛鍊兩月弗承廷杖之百革爲民其甥悲
失聲文言叱曰孺子真不才死豈負我哉後忠賢將殺
楊左復借口於文言復逮下獄嚴鞫者四欲誣楊左諸
人以贓文言蹶起曰天乎冤哉以吾口礮君子有死不
承卒斃於獄

江天一字文石歙諸生深沉多智爲同郡金聲所知佐
聲用軍法訓練鄉人子弟後被執聲曰子有老母不可
死對曰天一同公起兵可不同公殉義乎遂偕死

楊泗祥字瑞呈休寧人父卒未葬土寇猝至家人遠避
獨守柩不去寇戒勿犯復還古書院田創紫陽六邑文
會好義不倦

國朝張正茂字如松歙縣人父篤老病臥十餘載正茂躬滌
矢溲親調餽餌曾無倦色嘗買婢詢知其父無他息卽
還之不責值善詩古文有集

項繼成歙縣人年十四刲股療繼母疾宗族欲爲請旌
繼成泣謝曰此非爲名且不欲令吾母知之也
金應忠休寧人偕弟出游遇寇弟曰兄能事母寧殺我
兄曰弟未有子寧殺我賊義而釋之

程大任字元勝休寧人任俠好義有張姓貧鬻其妻濟以金得不鬻有豪擠其讐於獄爲力雪之

唐祁歙縣人少卽出游治生以養親親沒遂不出父嘗貸某金後某僞以失券告祁曰券雖無事則有也償之旣而他人復以前券來曰事雖僞券則真也又償之人傳爲笑曰吾感其初能急吾親耳疾革語其子曰力能濟人自親族始母見德母市名

汪思孝婺源人斃石梁以防溺置義田以贍族設義塾以訓貧子弟遠近稱之

程六德字侯倩休寧人幼穎異聞塾師說孟宗王哀諸故事輒流涕長力於學母卒水漿不入口旬日以毀卒

唐道林績溪人國初土寇竊發拘兄道俊索金贖命道林入賊窩代死道俊子葬以父禮服喪三年

胡名儒休寧人尚義任俠其世父流離湘漢間名儒訪歸奉養親友婚喪有不給者拮据助之

程世鐸歙人父賈於滇遭吳逆變絕音耗鐸告廟尋訪五年遇父於烏蒙奉歸盡養 雍正三年 旌表

汪龍字時六歙人祖客死於蘇父往迎柩復溺於采石時龍方六歲及冠出覓祖父棺晝夜號泣感神告得之

雍正三年 旌表

楊嗣勃字鶴臯休寧人事親孝老彌篤從兄爲山賊所掠嗣勃微服造其壘獻資求釋

孫鳳翽力耕負販供祖父母及

翽清晨長跪舌舐逾年復明 雍正七年 旌表

趙照字公泳八歲侍父疾人稱孝童母病禱北辰有燭

光交焰之異兄弟同居無私財 雍正八年 旌表

金慶治休寧人母喪哀毀尋亦病歿有建宗祠養孀姑

撫諸甥卹母族諸義舉 雍正八年 旌表

朱元儼休寧人十歲父病顙天求代母患疽儼以舌舐

得痊親沒廬墓歸未一月而卒 雍正十三年 旌表

汪鼎和字公調休寧人父嬰疾禱天求代歲饑捐賑

戴爲轂字季環休寧人少孤貧先墓在和村卑濕地欲

改葬力不逮乃痛自刻責不飲酒茹葷隆冬却絮曰先

人魂魄不安吾敢戀輕煖乎後客吳興卜吉羅山歸啓

墓則水溢棺腐號慟欲絕易槨赴葬遂廬墓側

金肇基字印初休寧人幼有至性三歲母爲提蝨白母

曰兒喫母乳無異蝨喫兒血遂自斷乳親沒廬墓三年

山故多虎不懼虎亦遁跡

程浚字葛人歙人歲貢生事嗣父母及本生父母俱盡

孝合葬四棺於一塋嘗陳亭戶疾苦客吉安值茶陵兵

變代守土官區畫拒守計城以得全

王朝珩婺源人歲貢任繁昌教諭居家孝友置田贍族

發困賑饑著培桂堂集

汪光翰字文卿婺源人明季客

死獻賊惟媳朱氏與幼子得脫

斗米十金光翰或服賈或課蒙稍獲贏餘給其母子經二十餘年不倦蜀平道通送還景陵時稱義士

汪晉字庶蕃歙人寄籍江寧諸生嘗構宗祠置義田以成先志篤於友愛白首無間言自給甚約而周急拯危不少前却

